

दिनांक 24.07.2024

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रदेश मांय ढांचागत विकास ऊं जुड़ी परियोजनावां सारू राज्य सरकार अर हुडको बीचे एक लाख करोड़ रूप्या रो करार करी ज्यो ।
- जैसलमेर मांय 400 मेगावाट सौर ऊर्जा संयत्र ऊं बिजली बणबो सरू व्ह्यो- मुख्यमंत्री भजन लाल शर्मा वर्चुअल तरीका ऊं इण री सरूआत कीनी ।
- रेल मंत्री अश्विनी वैष्णव कह्यो - राजस्थान मांय रेलवे रा विकास सारू 2 लाख 62 हजार करोड़ रूप्या ऊं बत्ती रकम रो बजट दियो ज्यो ।
- प्रदेश मांय चौमासा री बिरखा रो दौर जारी-आज ई केई ठौड़ां चोखी बिरखा व्ही ।

000

राज्य सरकार अर हाउसिंग एण्ड अरबन डवलपमेन्ट कॉर्पोरेशन लि-हुडको बीचे आज ढांचागत परियोजनावां रा विकास सारू एक लाख करोड़ रूप्या रा करार माथे सही करी ज्यी । करार रा तहत हुडको आवता पांच साल मांय पाणी, बिजली अर पाणत सारू पाणी सरीखा बुनियादी सुबीतां सारू सालाना बीस हजार करोड़ रूप्या रो कर्ज मुहैया करायो जावेला । जयपुर मांय राख्यी ज्या कार्यक्रम मांय हुडको कानी ऊं जल जीवन मिशन सारू राज्य सरकार ने 1 हजार 577 करोड़ रूप्या रो चैक संपी ज्यो । ई मौके मुख्यमंत्री भजन लाल शर्मा कह्यो के प्रदेश ने पाणी, बिजली अर पाणत रा हलका मांय अव्वल बणावण सारू राज्य सरकार लगातार काम कर रही है । मुख्यमंत्री कह्यो के राज्य मांय साढ़े 28 हजार मेगावाट बूता री अक्षय

ऊर्जा अर 3 हजार 325 मेगावाट बूता री थर्मल पॉवर परियोजनावां सारू डोढ़ हज़ार करोड़ रूप्या रा निवेश बाबत् करार कर्या जा चुक्या है।

000

जैसलमेर मांय सूरज री रोशनी ऊं 400 मेगावाट बिजली बणावण रो काम सरू व्हे ग्यो है। मुख्यमंत्री भजन लाल शर्मा जयपुर ऊं वर्चुअल तरीकां ऊं इण रो उद्घाटन कीनो। इण ऊं प्रदेश मांय बिजली रे पेटे साढे तीन सौ करोड़ रूप्या रो खर्च कम व्हेला। ऊर्जा विभाग रा अतिरिक्त मुख्य सचिव आलोक आ जाणकारी दीनी। वे बतायो के 200 मेगावाट बिजली बणबो अक्टूबर महीना तांई सरू व्हे जावेला। बिजली बणावण रा आं दोन्यू कारखानां ऊं राज्य री नवीकरणीय ऊर्जा क्षमता मांय बधोतरी व्हेला। राज्य मांय एक गैर सरकारी कंपनी री ओर ऊं साढे पांच हजार मेगावाट बिजली बणावण सारू नवीकरणीय ऊर्जा परियोजनावां चलायी जावेला।

000

मुख्यमंत्री भजनलाल शर्मा कह्यो है के लारला दिनां पेश करी ज्या राज्य रा बजट मांय प्रदेश रा नौजवानां, महिलावां, किसानां अर गरीबां रा भला ने ध्यान राखता थकां योजनावां अर कार्यक्रमां रो ऐलाण करी ज्यो है। वे आज बजट मांय करी ज्या ऐलाण माथे सरकार रो धन्यवाद देवण सारू कोटा, ब्यावर अर जैतारण ऊं आया लोगां सागे बातचीत कर रह्या हा। मुख्यमंत्री कह्यो के भाजपा रा संकल्प पत्र मांय करी ज्या करीब 45 फीसदी वायदा पूरा कर दिया ज्या है। मुख्यमंत्री वां सागे मुलाकात करण सारू आया जनता रा नुमाइन्दां, नामी लोगां अर आमजन ने सगळी घोषणावां टेमसर पूरी करण रो भरोसो दिरायो।

000

केंद्रीय कानून अर न्याय मंत्री अर्जुन राम मेघवाल कह्यो है के संसद मांय पेश करी ज्यो केंद्रीय बजट समाज रा हर तबका री जनता ने फायदो पूगा र विकसित भारत बणावण रो गेलो साफ़ करेला। वे आज नई दिल्ली मांय एक वेबिनार मांय बोल रह्या हा। मेघवाल कह्यो के ई बजट ने विकसित भारत /2047 रा नज़रिया ऊं देखणो चाहिजे, जिण रो मकसद सगळां ने टेमसर आसानी ऊं न्याय दिरावणो

है। मेघवाल कह्यो के वित्त मंत्री निर्मला सीतारमण कानी ऊं पेश करी ज्यो केन्द्रीय बजट सगळां रो विकास करण वाळो है।

000

वित्तमंत्री निर्मला सीतारमण बजट मांय कुछ राज्यां सागे दुभांत करण रा आरोप ने गलत बतायो है। वे आज राज्यसभा मांय शून्यकाल रे दौरान कह्यो के कांग्रेस री अगुवाई मांय विपख रा सदस्य लगातार केहवण री कोशिश कर रह्या है के विपख री पार्टियां रा राज वाळा राज्यां ने बजट मांय कांई नी दियो ज्यो है। वे साफ़ कीनो के किण ई बजट मांय हर राज्य रो नाम नी लियो जा सके है। वित्त मंत्री कह्यो के गर किण ई राज्य रो नाम बजट भाषण मांय नी लियो ज्यो इण रो मतलब ओ नी है के केन्द्र सरकार री योजनावां रो फायदो वां राज्यां ने नी मिलेला। विपख रा नेता मल्लिकार्जुन खड़गे कानी ऊं सदन मांय लगायी ज्या आरोप रा जवाब मांय सीतारमण कह्यो के केन्द्रीय बजट मांय महाराष्ट्र अर पश्चिम बंगाल सारू केई विकास परियोजनावां रो ऐलाण करी ज्यो है। ई पाछे विपख रा सदस्य सदन ऊं बाहर निकळ गया। लोकसभा मांय ई ई मुद्दा माथे विपख रा सदस्य सदन ऊं वॉकआउट कीनो। संवारे सदन री बैठक सरू व्हेतां ई ही कांग्रेस, समाजवादी पार्टी, डीएमके, तृणमूल कांग्रेस अर दूजी पार्टियां रा सदस्य आंध्र प्रदेश अर बिहार रे अलावा दूजा राज्यां सागे कथित तौर ऊं दुभांत करण रे खिलाफ़ प्रदर्शन कीनो। स्पीकर ओम बिड़ला ई माथे कह्यो के शून्यकाल रे दौरान सदन री कार्रवाई मांय सोच-समझ र अड़चन डालनो ठीक नी है। संसदीय कार्य मंत्री किरेन रिजिजू ई विपख रा सदस्यां रा व्यवहार माथे सवाल उठाता थकां कह्यो के प्रश्नकाल रे दौरान विरोध प्रदर्शन ठीक नी है।

000

000 **ब्रेक** 000

संसद मांय पेश करी ज्या बजट मांय रेलवे सारू 2 लाख 62 हजार करोड़ रुप्या ऊं बत्ती रकम रो प्रावधान करी ज्यो है। रेल मंत्री अश्विनी वैष्णव आज वीडियो कांफ्रेंसिंग रे जरिये खबरनवीसां सागे बातचीत करता थकां आ जाणकारी दीनी। वे कह्यो के ई रकम ऊं रेलवे सुरक्षा अर ढांचागत विकास सारू मोकळा काम कर्या जावेला। रेल मंत्री कह्यो के बजट मांय राजस्थान मांय रेलों रा विकास सारू 9 हजार 959 करोड़ रुप्या राखी ज्या है।

वे बतायो के प्रदेश मांय रेलों ऊं जुड़ी करीब 51 हजार 814 करोड़ रूपया री परियोजनावां माथे काम चाल रह्यो है।

एस बी—अश्विनी वैष्णव

रेल मंत्री बतायो के 85 रेलवे स्टेशनों ने अमृत स्टेशन योजना रा तैत विकसितक कर्या जा रह्या है। वे बतायो के लारला दस साल मांय करीब डोढ़ हजार पुलिया अर अंडर पास बणायी ज्या है। ई मौके उत्तर पश्चिम रेलवे रा महाप्रबंधक अमिताभ बतायो के मौजूदा दौर मांय चाल रही रेल परियोजनावां रा काम ने तय बगत परां पूरा करण सारू लगातार जतन कर्या जा रह्या है।

एस बी—अमिताभ

000

बूंदी मांय आज जिला स्तर रो वन महोत्सव राख्यी ज्यो। ई दौरान बरधा कने लवकुश वाटिका माथे जनता रा नुमाइन्दा, प्रशासनिक अहलकार अर आम जन मोटी तादाद मांय पौधा रोप्या। जिला कलेक्टर अक्षय गोदारा बतायो के पूरा जिला मांय 15 लाख पौधा रोपणो तैय करी ज्यो है। वे जनता ऊं एक पेड़ मां के नाम लगावण रो संकल्प लेवण अर वां ने मोटा करण री जिम्मेदारी उठावण री अरज कीनी। शाहपुरा मांय हरियाळो राजस्थान अभियान रा तहत पौधा रोपण रा अभियान रो जायजो लेवण सारू जिला कलेक्टर राजेन्द्र सिंह शेखावत अहलकारां सागे मीटिंग कीनी। जिला कलेक्टर ई अभियान रा तहत 7 अगस्त ने हरियाली तीज रे मौके बत्ता ऊं बत्ता पौधा रोपण सारू जनता मांय जाग जगावण सारू कह्यो। पाली मांय ई एक सौ दिन रा संकल्प अभियान रा तहत आज वृक्षारोपण थीम माथे महिलावां अर टाबरियां सारू मेहंदी माण्डण री होड़ राख्यी ज्यी। सरहदी जिला जैसलमेर मांय ई हरियाळो राजस्थान अभियान रा तहत पौधा रोपण कार्यक्रम राख्यी ज्यो। ई दौरान पीएम श्री विद्यालय महादेवनगर मांय विद्यार्थी अर अध्यापक 300 ऊं बत्ता पौधा लगाया।

000

कारगिल री लड़ाई मांय जीत हासिल करण रा 25 साल पूरा व्हेवण रा सिलसिला मांय आज जयपुर रा फौजी स्टेशन माथे खास कार्यक्रम राख्यी ज्यो। कार्यक्रम मांय दक्षिण—पश्चिम कमान रा जनरल ऑफिसर कमान्डिंग इन चीफ, लेफ्टिनेंट जनरल मनजिन्दर सिंह कारगिल री

लड़ाई मांय देश सारू बलिदान देवण वाळा फौजियां ने सिरधाभाव सागे याद कीना। वे बतायो के सप्त शक्ति कमान री ओर ऊं 21 ऊं 26 जुलाई बीचे न्यारा-न्यारा कार्यक्रम राख्या जा रह्या है। आं मांय पौधा रोपण, फौजी साज-ओ-सामान री प्रदर्शनी लगावणो खास है।

000

प्रदेश रा न्यारा-न्यारा हलकां मांय चौमासा री बिरखा व्हे रही है। आज ई केई ठौड़ां चोखी बिरखा रा समाचार है। भीलवाड़ा जिला मांय आज केई ठौड़ां ज़ोरदार मेह बरस्यो। **जिले के गुलाबपुरा, मांडल और आसिंद में हुई तेज बारिश से किसानों के चेहरे खिल उठे।**

वीसी-पीटीसी भीलवाडा

टोंक मांय दोपहरां पाछे व्ही तेज़ बिरखा ऊं गर्मी ऊं साता मिली। दौसा मांय बरस्या ज़ोरदार मेह ऊं नीचला हलकां मांय पाणी भर ग्यो। पेश है म्हाणा खबर नवीस री रपट

वीसी-पीटीसी दौसा

भरतपुर मांय ई करीब आधा घंटा ताई व्ही बिरखा ऊं मौसम सुहावणो व्हे ग्यो। चूरू मांय ई आज व्ही चोखी बिरखा ऊं किसानां रा चेहरा मुळक ग्या। राजधानी जयपुर मांय ई संवारे ऊं ई केई हलकां मांय रूक-रूक र बिरखा व्ही। मौसम विभाग रे मुजब मानसून री ट्रफ लाइन आज बीकानेर अर सीकर ऊं व्हेती निकळ रही है। इण रा असर ऊं राज्य रा ऊगणी हलका मांय केई ठौड़ां जद के आतूणी हलका रा बीकानेर संभाग रा कुछ हलकां मांय आवता चार-पांच दिन ताई बिरखा चालती रेहवण रा आसार है। कोटा, उदयपुर अर बीकानेर संभाग रा कुछ हलकां मांय ई बादळां री गाज़ सागे बिरखा व्हेवण रो अंदाजो है। मौसम विभाग रे मुजब भरतपुर, जयपुर अर अजमेर संभाग अर शेखावाटी हलका रा कुछ भागां मांय बिरखा व्हेवण रा आसार है।

000